

四庫全書

史部

欽定四庫全書

續資治通鑑長編卷二百九十一

宋 李燾 撰

神宗

元豐元年八月壬寅朔權荆湖北路轉運判官馬城言
諸州已裁定年額公使錢數欲乞造酒所用米麴許前
一年申本司借錢造麴糴米復於次年合破錢數內分
四季剋除先是知荆南吳中復言臣嘗為御史彈奏今

旨依所乞而鼎尋奏劾中復公使錢庫違法事遂罷中
復前命及是又詔城總案一道固宜以身徇法倡勵部
官江陵府違法豫借公使既不即按治又擅貸與轉運
司錢數千緡今為趙鼎所發謂當悔罪恐懼以俟典刑
乃敢公無忌憚飾非議法情極阿私理不可恕宜先衝
替令於岳州聽旨及中復前任違法事並令京西轉運
判官胡宗回劾奏 詔五路土兵都虞候換前班人有

功勞者樞密院與差遣替或資闕餘無功勞三班院差替年滿闕內雖年過六十而精力未衰堪任巡檢駐泊捉賊差使者樞密院相驗差之 詔廣南西路提點刑

獄司劾轉運司發土丁運糧及以賣不售衣物折軍士

衣賜因依以聞

蘇轍論張頴除戶侍不當劄子第二項有運糧事折支衣賜未詳轍云頴為轉

運使日有安南般糧夫數千人逃還以經曲赦放罪每人只有欠官米錢七百後來頴欲差人往全州般糧遂召陽朔縣令魏九言臨桂縣令李譚勒令差兩縣逃亡夫往全州般糧仍令九言取本縣百姓莫飯奴等七人狀云所欠官錢七百情願往全州般糧填還其七人中又有三人不係逃亡只取到四人情願狀便差數千人

况欠錢止于七百而全州水路二十餘程豈有情願之理因此溺殺人不致入戶經提舉司過狀亦是劉誼具事由聞奏方始住差

舒州團練推官崇文院校書中書禮房

習學公事蔡京為大理評事權檢正禮房公事

此八月一日事

據中書時政記增入

癸卯詔知岷州种諤集蕃官出鼎爾溫及羅卜藏對衆明諭所犯凌遲處死妻女田產並賜包誠子年十五以上配廣南牢城十四以下聽隨行以所命鼎爾溫官回授格烏補三班奉職賜絹二百匹錦袍銀帶各一結錦遷

兩資賜絹百匹先是熙寧中果莊犯邊境竊爾溫羅卜藏
首率部族叛附果莊及邊事纔息乃來降既又陰與董
戩果莊合謀諤言恐為邊患因上董戩果莊所與書及
羅藏親書蕃字故有是詔 大理寺言知澶州右諫議
大夫韓琦坐所舉駕部郎中俞士龍犯入已贓當追一
官勒停詔免琦勒停以琦嘗應副河事有勞故也

乙巳京西路轉運司言軍賊黃青等正賊不多餘多驅
虜乞令所虜百姓婦女等許經村堡或官司自首雖嘗

驅率作過並釋罪若捕盜人等見被驅虜之人即令招呼亦與免罪如敢鬪敵者自令捕殺中書擬依而上批今賊已破散獵取餘黨不難為力近安撫等司累奏獲首級深慮冒賞小人害及無辜可速指揮如尚有未盡之人聽捕執赴官毋得斬級 詔發提舉河北糴便司撥錢鈔十萬緡應副河北路轉運司秋糴瀘州都大經制夷賊公事韓存寶言乞自起發後令本道毋得使人招納夷賊雖有降者且令說諭候經制官到日指揮從

之

丙午詔樞密直學士知定州薛向赴闕仍詔向自舉代者特遣中使迎賜茶藥蓋密許向以大任而執政未知也 又詔三司借明年解鹽鈔五十萬緡付陝西路都轉運司市糧草

丁未詔河北轉運司差官體量被水人戶災傷及七分處再檢視蠲其稅不及七分者並檢覆即依法施行大理寺言澶州曹村河水溢抹岸官吏失不預請修貼

隄岸其巡河欒文德當追一官勒停都大提舉苗師中
都水丞王謹微權外監丞陳祐甫及知澶州韓琦等當
贖銅各該赦原詔欒文德淮南編管苗師中衝替並追
兩官王謹微衝替陳祐甫降一官韓琦以應副修閉決
口聽以功贖過

己酉上批假左諫議大夫史館修撰高麗國信使安燾
假起居舍人直昭文館副使陳睦可候使還並與所假
官職

三月七日往九

月二十二日還

詔河東陝西路依京東西等路

指揮推行義倉法自今年秋料為始

六月二十四日丙寅詔合參照

知順州西上閣門使康州團練使陶弼為東上閣門使

以嘗得旨順州知州先轉一官候及一年更轉一官任

滿仍陞一任而弼到任已一年故也弼尋卒

弼卒在十一月壬午

今并書

詔永興軍秦鳳路提舉折納李孝博具析違法

令民折納因依以聞又詔諸路提舉司與轉運司如

有所兌換並以錢物對行交撥諸官戶欠常平錢物第

四等以上雖經災傷毋得展限倚閣又詔諸路給散日

並自辰前以保分資次逐名給散仍於保狀用墨印請
訖字為驗既已約日無故輒移或託故不支并留滯請
人經宿者當職官並徒二年 度支員外郎直龍圖閣

權知福州曾鞏判太常寺未至改知明州

十月三日改
明州今附見

入內高品李穀言編排賜董戩等物乞下所屬供赴資
善堂編排從之 詔賜董戩等物以詔果莊止以敕

經制熙河路邊防財用司言被旨均定熙河岷州通遠
軍公使錢乞以轉運司歲所支四州軍公使數並撥付

本司均支外尚少錢二萬緡本司乞管認帖支數足仍
乞並罷逐州軍回易令定熙州四萬五千緡專犒設蕃
部河岷二州及通遠軍各萬二千緡內二千緡專犒設
蕃部從之 詔自今官司及官負伎術舉人等於折博
務占買鹽鈔及越次給鈔者并本務干繫人並科徒二
年罪不以赦原告者每名賞錢一百緡

壬子以起居舍人集賢院學士知宣州沈括為知制誥
知潭州既而御史中丞蔡確言括反覆附會謫不踰歲

復列侍從其罰既薄而復之太速詔罷括知制誥依舊

知宣州

確言在二十二日癸亥今并書時政記八月十九日載尤詳今但從實錄中書時政記

御史中丞蔡確言陛下有救敝復古之政而羣臣未變習常守陋之態陛下有焦勞惻怛之慮而羣臣未革苟且前却之心不忠於主而忠於所附不畏義理而畏流俗相合為黨相尚為風當是之時不正之以法而函容寬假以待其自化亦何以異於呼噓引挽而欲已瘡熟之沉痾也如沈括之反覆附會謫不踰歲復列侍從其罰既薄而其復若此之速詔沈括依舊知宣州前降指揮更不施行

起居舍人龍圖閣

待制知廣州曾布知桂州 提舉市易司兼在京諸司

庫務太常丞集賢殿修撰俞充為右正言天章閣待制

知慶州王珪知上欲伐夏國故奏乞用充為邊帥使圖

之以迎合上意自固其位云

邵伯溫見聞錄云元豐初蔡確排吳充罷相指王珪

為充黨欲并逐之珪畏確引用為執政時珪獨相又神宗厭薄之珪不悟確與驚覺之一日密問珪曰近上意於公厚薄何如珪曰無他確曰上厭公矣珪曰奈何確曰上久欲收復靈武患無任責者公能任責則相位可保也珪喜謝之適江東漕張琬有違法事帝語珪欲遣官按治珪以帝意告都檢正俞充充與琬善以書告琬琬上章自辯帝問珪曰張琬事惟語卿琬何故知珪自以漏上語退朝甚憂召俞充問之充對以實珪曰某與君俱得罪矣然有一策當除君帥環慶亟上取靈武之章上喜罪可免乃除充待制帥環慶充果建取靈武之策未幾充暴卒而高遵裕代之有旨以遵裕節度五路大兵為靈武之役涇原副帥劉昌祚領本部兵先至靈

武城下以遵裕未至不敢進熙河李憲兵不至鄜延副帥种諤獨先班師遵裕至夏人大集決黃河水以灌我師凍餒沉溺不戰而死者十餘萬人遵裕狼狽以遁夏追襲之諤擁兵不救以實其說推其兵端由王珪避漏上語之罪所致紹聖初謂珪策立哲宗有異議以為臣不忠追貶實非其罪而靈武之禍則其罪也蔡確罪尤大貶死新州有以也夫按蔡確以二年五月參政吳充三年三月乃罷相此云充已罷相王珪恐并被逐引確參政誤也俞充罷都檢正在熙寧十年十二月五日以集賢殿修撰都提舉市易司及在京諸司庫務元豐元年四月四日向宗儒實為都檢正俞充八月十一日方除待制知慶州此時俞充已不為都檢正吳充初未罷相又張琬以荆湖北路提舉常平坐不當越職言知荆南張頴衡替實元豐元年正月二十日此云吳充罷相俞充為都檢正張琬為江東漕皆誤也張琬當是何琬按俞充本傳充屢請討伐西夏元豐四年五月又上章

六月充暴卒然則初除充帥慶州時未即上靈武之章
靈武之章蓋後此三年見聞錄所載事要不可信或珪
用充作帥其意固在迎合上旨故實錄舊傳云充既死
西師遂大舉實自充發之但見聞錄所載因由悉差繆
耳今附見于此更俟考詳俞充後坐以何琬案發呂嘉
問事告嘉問罰銅二十斤在二年五月六日詰呂嘉問
何從知何琬案發在元年九月二十六日蘓轍龍川別
志元祐中蔡確坐弟碩事謫知安州作甌山公等詩意
有所譏切諫官言之未決予兄子瞻出守杭州密奏言
若置確不問則於今皇帝孝治為未足若不稍加闊略
則於太皇太后寬政為少損竊謂皇帝宜降詔推治而
太皇太后特加寬貸確若稍知義理當齟舌自殺太皇
太后深以為然兄出城特遣中使賜茶藥等大臣持確
議不置確遂南遷新州時議者以為用法太深然確頃
自小臣擢用每遷皆以鞫獄被賞衆以為善惡之報不
可誣也孫和甫時在密院予偶見之問及新州事予以

所聞答之和甫曰固在西府親見神宗晚年以事無成
功當寧太息欲召司馬君實用之時王禹玉蔡持正並
在相位相顧失色禹玉憂不知所出持正密議欲于西
邊深入敵巢穴以此議若行必不復召君實雖召將不
至自是西師入討將士被害死者無算新州之命則此
報也蓋自西邊用兵神宗常持淺攻之議雖一勝一負
猶不至大有殺傷至于西邊將帥習知兵事亦無肯言
深入者非禹玉持正不歷外任不習邊事無敢開此議
者新州之禍當出于此按元豐四年六月初議舉兵
入界七月五日庚寅遂降十六項指揮九月二十三日
丙午始降敕榜諭夏國似參用孫固聲罪薄伐之說也
固說見此年六月末當此時王珪獨相蔡確但為參政
明年四月二十二日癸酉確乃與珪並
相蘇轍云云當與邵伯溫云云并考

詔自今科場

考試刑法官並中書差官

經制熙河路邊防財用司

乞留同管勾經制提點刑獄霍翔常在熙河更不分巡
詔翔免秦鳳等路提點刑獄其序官服色俸給仍視之
上批朝服法物庫可依郊廟祭器庫例差皇城使海
州團練使入內副都知蘇利涉文思使忠州刺史內侍
押班高居簡提點自今不隸提舉司

癸丑觀文殿大學士禮部尚書知太原府韓絳知定州
右正言直龍圖閣知桂州趙高天章閣待制知太原
原府初命高知定州代薛向會絳以疾乞內徙一藩郡

乃詔與高易地先是上以手答問高交人逆順之情彼將入貢於新疆降民必有邀求應之緩急與之多寡宜如何高對曰賊旅拒富良渠首麇集江潯勢窮力蹙然後請命今邊釁僅平宜寢兵息民而溪峒首領欽廉蜚戶素倚寇以徼利張皇聲勢以搖邊情輕信喜事之徒同聲附和慮貽南顧之憂臣觀賊勢所未敢動者三始交賊以劉紀輩為謀主今悉補吏廣源思閬州金銀坑冶租賦之饒盡歸封略新附溪峒自為首領支分黨別

誠難猝合况被邊枝梧無從誘脅我既得其外府斷其
右臂數年之間勢當自斃乾德閣穉政出多門人方携
離自保不暇其未敢動一也文州抵舊邊寨十餘程賊
來未嘗贏糧止仰紀輩招取以贍不支半月復恣漁奪
彼民深仇之紀輩舊與省地溪峒締交倚為鄉導乃敢
入寇今藩籬一空彼何恃而窺邊哉犯順以來不耕者
二年矣省地之民亦廢農業重以調發疾疫死亡不可
勝數就令妄意復爭疆土才過長江即踐省地以何鄉

導因何糧食賊兵幾何自衛水陸分道兵寡氣奪此未
敢動二也交賊重斂中下之家歲輸逾百緡供官十之
四餘皆入於酋領至奪没生財妻女以償不足邊民怨
怒昨王師攻討惟務懷來降附之衆皆依敕榜免五年
租賦羣情翕然順向苟復來誘脅孰肯從亂必未敢動
三也以三不可動之勢新困傷夷而慮再干天威斯亦
過矣昔狄青破儂賊即日班師不蕩其巢穴而智高卒
就禽馘況今交賊旁無與國舉皆仇怨孤危如籥墮滅

可待時或議再舉上得奏罷之而赦乾德嶺表遂安南
服距國遠戍兵無紀律一日有潰歸家營者兩軍高移
檄州將曰士宿勞於外予休澣告一月遣還比過府高
犒之呼旅長詰問皆曰久戍瘴地思家耳高曰吾母八
十欲歸寧得乎立命斬之餘悉杖配他州 軍器監言
已裝發廊延路器甲乞下京西路轉運司指揮所歷官
司及巡檢縣尉巡鋪使臣等隨地分交割運置出界委
知州提領監司覺察如違並奏劾其諸路所起發軍器

亦乞依此從之 御批河北屯田都監謝禹珪為性誕
率建畫職事多無規繩前日與禹珪不協者今已替去
見今聯事之人了無嫌礙宜令自今並與河北屯田司
官連銜行遣毋得獨申奏其權發遣河北東路提點刑
獄汪輔之更不令同管勾 詔熙河路去歲一年支費
錢帛令趙濟具實數以聞 知諫院黃履言貢舉新敕
以諸科口授舊條刪為進士傳義之法購賞既重證驗
難明施之禮闈恐生誣罔乞再刪定從之

甲寅知制誥兼侍講黃履為遼主生辰使皇城使雅州
刺史姚兕副之太常博士周有孺為正旦使西京左藏
庫副使楊從先副之繼而經畧司留兕防秋乃以東上
閤門使榮州刺史狄誥代之 涇原路經畧使蔡延慶

乞差劉惟吉張之諫充本路第二第三將上批近姚兕
使遼本路全闕可倚兵官張之諫見在廣西亦卒未有
還期可先改差新高陽關路鈐轄皇城使榮州團練使
劉惟吉充涇原路鈐轄兼第二將 軍器監奏請將官

皮甲以生白絲染紅代犛牛尾為瀝水上批絲為可惜
宜用它毛代之 詔在京發解進士據入試人數立定

解額隨所治經以十分為率均取之禮部準此 陝西

路轉運副使太常博士趙濟為右正言直龍圖閣知熙
州代張詵也 詔開封府界京東路皮角並依舊通商

熙寧八年正月
十一日可考

又詔諸路提舉市易官並依前逐年

比較酬獎

乙卯上謂輔臣曰昔諸葛亮將有事於中國即先有事

於蠻夷如孟獲輩至七縱而七禽之蓋先有以服其心
使無後患然後可以東向與魏爭利而定霸也然則天
下之事欲為之豈可以無序哉語已因及解子平事王
珪曰北人自劉六符杜防輩畫策請時以小事撓中國
所以示強亦足固歲幣也邇來數辯疆場小事其意蓋
出于此上曰時有變事有宜欲持守常之論以應無窮
之變未見敵之利也昔王猛將死符堅以國事詢之猛
戒其伐晉堅不聽卒致敗者蓋猛自知將死顧羣臣皆

出已下必不能取晉故以此戒堅使猛在則他日取晉亦不難此時事所以不可一槩論也吳充曰慕容秦之世讎而腹心之患也堅不知憂此而勤遠畧故猛深以為言耳上因言人主當厲精身先昔秦孝公用一商鞅賞罰必信故能興起功業趙武靈王撫服國人鼓舞服從至後世白起長平之役坑趙卒四十萬而人心不離猶足存趙者豈非國人服習武靈王之法耶古人云豈無辟王賴前哲以免者此也且唐藩鎮不如六國之強

秦并六國而唐不能制藩鎮良有以也故孟子曰入則
無法家拂士出則無敵國外患者國恒亡然後知生于
憂患而死于安樂也且如唐明皇能加意政事常如開
元時豈復有安史之亂耶其後穆敬皆昏主不足言惟
憲宗初振紀綱委任裴度能平淮西後亦惑于方士外
不能制藩鎮內不能制閹官卒致禍變是以天下之事
常戒于漸朝廷之法當在堅守也元絳曰總攬權綱在
人君人臣奉循法度而已上曰臣下或踰法度過求恩

澤願未為害惟不可使小人撓政爾吳充曰昔顏淵問
為邦夫子尚戒其放鄭聲遠佞人佞人為害不可不察
元絳因論宋興百年用刑不濫民心所以安固者其刑
平而已自古以來百年中興無事未有如此之盛者上
曰此祖宗成憲朕敢不承卿等執政日久朕所倚任惟
協心以輔朕吳充曰臣等才術短淺雖知難強然苟有
聞見敢不盡愚況皆親承聖訓願殫夙夜之力於是帥
同列再拜以謝

神宗正史吳充傳畧載此以為上意有
激而云充但曰誠如聖詔蓋譏充與王

安石異議今不取中書時政記載此事在十四日其語尤詳實錄在十三日今從時政記語則從實錄

工部尚書致仕劉渙卒

可削舊紀乙卯流星如椀出室距北蓋因實錄也新紀削去

丁巳內殿承制閣門祇候趙思齊為洛苑副使思齊自陳供職十年無過犯而上以其為趙普嫡長曾孫特遷之殿前副都指揮使賈逵言往安南諸軍有因身亡

寄納軍裝金銀衣物等在諸州乞估賣給鈔入遞聽其家於所在關請見錢詔入內省遣內侍一人自京至廣西刻刷應安南病死及放回道死軍士隨行或寄納物

除已給鈔外並附官舟上京內潭州以北陸路州縣即
差衙前計置脚乘或遞鋪般運盡輸殿前馬步軍司給
付本家 詔京東路轉運司齊州章邱縣被水災其所
修縣城倉庫官舍並給省錢其第四等以下戶欠今夏
殘稅權與倚閣見欠常平苗役錢令提舉司展料次聞
奏 兩紀附
年未 賜度僧牒六百付都水監分給開封府界
提點及河北轉運司鬻賣豫買修河物料以其半市稍
草還諸婦

戊午觀文殿大學士禮部尚書知定州韓絳為建雄軍

節度使

舊紀
書此

己未秦鳳路經畧使吕大防言前後喀木等所報事多
實頗見忠白乞依本人所請仍舊給歷月支綵絹詔如
李師中實曾給歷即依前給之後又詔大防如喀木委
是實情令親書番字齎赴經畧司 詔左諫議大夫史

館修撰安燾候使高麗回日判將作監 中書檢舉安
南責官取旨詔郭達趙高更候三暮年取旨李平一二

朞周沃一朞蔡旌候服闋日依平一朞數叙 詔自今
路分兵官互差 梓州路轉運司言瀘州夷賊作過闕
見錢支用乞於常平倉錢內撥三萬緡從之 又詔聞
邕州應存絹十六萬二千餘匹糧三十三萬餘石皆貯
於新造茅屋南方地氣蒸溽粟帛易損委轉運使陳倩
相度變轉仍加倩直集賢院其先陞一任指揮更不施
行 詔諸官負管押并附搭綱運所過州軍無故不得
住過五日如違三司勘罪以聞仍理納請過驛券若押

綱運擅離去者杖一百

庚申權度支副使太常丞集賢院修撰張琥以避五世祖嫌名乞改名操從之

壬戌知鄂州王韶言逃軍田勝等累刺配復走還作過已遣人捕斬給賞乞自今配軍逃亡為盜聽捕斬賞錢十千詔坐條劄與韶照會如所犯情深重罪不至死奏裁

癸亥詔瀘州權添公用錢一千緡於不係省錢內支候

夷事平日如故

乙丑利州路轉運使言興州濟衆監每歲舊鑄錢四萬一千緡計支本錢二萬四千緡得息萬七千緡應副茶場司今依蒲宗閔奏請增鑄常使錢三萬七千餘緡通舊鑄及額錢總七萬二千餘緡共支本錢四萬二千三百餘緡可得息錢三萬緡其宗閔所乞鑄一半大錢欲並鑄折二大錢不惟便于行用兼省工費得收息入茶場司足用及乞限一年撥還本錢從之仍令止鑄本路

見使錢 秦鳳路經畧使呂大防言欲選差人量齋茶
絲以回荅為名付果莊仍令說諭約束阿咱爾自今毋
得輒集人馬誘脅階州熟戶從之

丙寅右班殿直郝英授閤門祗候權蔡州信陽軍都巡
檢以斬獲賊黃青等四級二級英親獲故也 詔宗室

總麻以上親委主婚者擇三代中有二代非諸司出職

及進納伎術工商雜類惡逆之家子孫方許嫁娶

熙寧十年

九月五日壬子因彭汝礪論列始著令此又申明之實錄去年九月五日不載今兩存之

詔屯田

郎中劉宗古放歸田里以京東轉運司言宗古規孀婦李財產與同居而妄訴理錢物故也 詔大理寺習學

公事聽分半分文字未滿半年勿令斷品官贓案候成考委官審察如任斷官等即保明依正斷官例候有關與差選人通理習學滿二年以上仍通計歷任成四考有舉主二人與依兩任四考條轉合入京朝官並令別理資任如未嘗有歷任考第即候通理習學并詳斷等官共四年亦準此已係京朝官充習學者並依詳斷等

官理任條行之

丁卯詔翰林醫官使朱有章治知樞密院事馮京疾有勞可特與一子翰林醫學京疾甚上中夕詔左右適夢京造朝甚慰乃賜詔曰渴想儀形不忘夢寐及疾愈造朝上首以所夢語之

此事因朱有章附見當考

禮院言孟冬薦享

太廟當改為祫祭併祀七祠及配享功臣詔恭依

戊辰詔賜銀紬絹共為錢二十萬緡付廊延路經畧司依去歲例不依常制選官市糧草封樁是日黃履講

宰夫之職正歲書其能者與其良者而以告于上上曰
或言詔王廢置或言以官刑詔冢宰而誅之或言以告
而誅之或言以告于上何也履對曰詔冢宰者詔冢宰
而已以告而誅之以告于上者或詔王或色王及官長皆
不得專也上曰或三年或歲終則書能否告之以為廢置
此獨於正歲何也豈非舊歲之所考書以告乎履曰然
己已詔濱棣滄三州第四等以下被水災民令十戶以
上立保貸請常平糧四口以下戶借一石五斗五口以

上戶借兩石免出息零販竹木魚果炭箔等物稅百錢
以下聽權免一季 權發遣廣南東路轉運副使屯田
員外郎沈叔通追一官仍勒停坐提點福建路刑獄時
廖恩驚却措置乖方故也

庚午判北京留司御史臺龍圖閣直學士陳薦為寶文
閣學士提舉醴泉觀初薦罷青州得北京留臺將歸其
鄉里邢州上以路邇京闕特令入見而有是命 詔三
司令諸路轉運司勘會所轄州軍熙寧十年以前三年

收支應見在錢物除閑雜及理欠物更不條具其泛收
泛支或諸處支借出入并蠲放欠閣各令開析限半年
攢結成都狀送提點刑獄司驅磨保明上中書點檢有
不實科徒二年罪不理去官仍并治保明官吏如驅磨
出增隱錢物並當等第酬賞自今三年一供著為令以
中書言諸路財賦歲入歲支轉運司多不究心惟稱闕
乏宜有會計出入之法以察增耗以知有餘不足之處
也 又詔青齊淄三州被水流民所至州縣募少壯興

役其老幼疾病無依者自十一月朔依乞人例給口食

候歸本土及能自營或漸至春暖停給

兩紀附
年未


開封

府界提點司手分馮靖自言經本司糾告府界雍邱等

縣失陷稅錢五千八百餘貫乞酬獎詔支半充賞

此據
御集

八月二十八日事實錄于此書按此已
置岷州鐵城堡見熙寧十年六月末



欽定四庫全書

史部

續資治通鑑長編卷一百九十二

五

詳校官檢討

臣

劉錫五

刑部郎中

臣

許兆椿覆勘

纂修官修撰

臣

黃軒

謄錄舉人

臣

黃道巽

欽定四庫全書

續資治通鑑長編卷二百九十二

宋 李燾 撰

神宗

元豐元年九月壬申朔提舉成都府等路茶場李稷言
近者蒲宗閔乞于鳳翔府民間買鹽限一萬席運轉錢
本入川中市色遲疾不同難足此數乞令本司如商人
例買鹽入川變易本錢歲毋過萬席從之仍不得令州

縣出賣及抑配 以知江寧府呂嘉問知潤州江南東
路轉運司言嘉問違法不公乞移一郡所貴易以根究
故有是命於是嘉問亦言欲案治都大巡檢楊中庸等
罪而轉運司輒諭令自陳首乞差不干礙官吏推治詔
並送轉運司

嘉問以熙寧十年十月二十一日知江寧

陝西都轉運司言

秦鳳等路緣邊糴場積欠商人入中糧草錢五十九萬
緡詔三司特於年額外給鹽鈔三十萬緡以資次先後
均二年印給 詔諸路上供金銀錢帛應副內藏庫者

委提刑司督之若三司發運轉運司擅折變那移截留致虧本庫年額者徒二年

癸酉交趾貢方物

兩紀附
年未

甲戌詔自今料場奏所試策問並具撰人職位姓名先是上以別頭試官撰奏策問辭意有不當者莫知撰人為誰故有是詔 樞密院請非在京及將下禁軍指揮旗頭外馬步軍並以十分為率馬軍一分習槍刀餘習弓步軍二分習弓二分習槍刀餘習弩開封府界京東

西五路三百料錢軍分除已習槍刀外見射第一等弓

者為弓箭手餘并新招刺人並為弩手從之

兵志元豐元年詔在

京及將下禁軍以十分為率馬軍一分習槍刀餘習弓
步軍二分習弓二分習槍刀餘習弩五路軍士受奉三
百者除已習槍刀外見習第一等弓
者為弓箭手餘并新募兵並為弩手

乙亥詔管勾廣西常平等事劉誼根磨點檢廣西轉運
司及提舉兩浙常平事范珣會計安南軍事實費見管
不同因依并具逐色椿管在所內在邊遠無守備處並
移近裏州有不堪存留者可即貨易之其軍器即擘劃

拘收其餘路分亦移牒取索勘會以聞 都提舉市易
司言欲以市易務上界見欠內藏庫鹽引錢一百萬緡
候本務補滿本錢日依朝旨作二年還足詔許自來年
為始

丙子詔江南東路轉運提點刑獄司同劾江寧府違法
官吏以聞其推官王覺左司理參軍闕達仍先次衝替
先是止令轉運司按舉而呂嘉問繼有論列故令別司
兼治之

丁丑詔州縣官吏毋得迎送過客即泛遣使命及太中大夫觀察使以上聽如故 又詔都水監相度沿河榆柳令地分使臣兼管剝札及委都大官提舉具利害以聞 賜刑部郎中都提舉市易王居卿紫章服刪定在京當直所修成敕式三卷乞以元豐新定在京人從敕式為目頒降從之

戊寅詔自今常平免役坊場等錢物如諸處申奏移用已得旨並送司農寺指揮

已卯廣西轉運司言自軍興增戍兵甚衆又新叛順州
支用實繁乞以見在軍賞絹應副軍衣及諸賞給從之
上批令殿前司馬步軍司同提舉教習馬軍王中正
狄諮以常用白樺長弰弓隨弓長箭及新造黃樺闊闊
弓隨弓減指短箭宜各取一石一斗力試驗遣箭勁緩
入物淺深去步遠近保明以聞其後中正等保明奏至
乃詔自今用黃樺弓令承旨司立法承旨司奏應諸軍
揀填上四軍上四軍親從官騎御馬直小底揀填諸班

直及諸班直揀十將將虞候長入祇候并轉班之人欲自今引見呈試並依舊條逐等斗力用弓箭南庫打礮黃樺闊閃弓減指箭弩並遞加三斗從之

壬午左班殿直成卓乞辭邕州提舉右江兵馬賊盜都巡檢止就英州清溪或韶州岑水場駐泊捉賊勾當詔不許辭依廣南西路經畧司奏就差仍依條先與轉官候任滿與除閤門祇候司農寺請諸路秋熟處民戶積欠常平免役等錢穀三分以上聽量增錢折納從之

三司言河東都轉運司乞續支京鈔見鈔三十萬緡計置軍儲今欲依糴買封樁糧草例于末鹽錢內支錢一十萬緡換作本路交引收附與轉運司計置極邊糧草却以末鹽錢撥歸省司從之 提舉成都府等路茶

場司請出茶州軍每歲曉示園戶如敢採造黃老秋茶中賣不以多寡並沒官仍乞每歲別委官驗視已有納到如此色樣並令燒毀從之 權發遣河北東路提點

刑獄汪輔之言近取索大名府公使例策照使又有新

置特送例一策今監司吳審禮高鍾常受例外特送酒

其例策臣已帶在本司準備證驗所覲朝廷少知外臣

貪潔之迹詔輔之速以例策還大名府

印伯溫見聞錄云文彥博判大

名輔之初自河北西路轉運判官徙東路謁彥博方坐聽事閱謁置按下不問入宅久之乃出輔之已不堪既見彥博禮之甚簡謂曰家人頃令沐髮忘見運判勿訝輔之沮甚舊例監司至之三日府必開筵彥博故罷之輔之移文刻日檢按府庫通判以次白彥博彥博不答是日與家人宴內外事並不許通匙鑰不可請輔之怒破架閣庫鎖亦無從檢按也密劾彥博不治上批輔之所上奏付彥博有以待中舊德故煩卧護止門細務不必勞心輔之小臣敢爾無禮將別有處置之語彥博得之不言一日會監司曰老謬無治狀幸諸君寬之監司

皆愧謝因出御批以示輔之輔之皇恐逃歸托按部以
出未幾輔之罷案輔之以熙寧十年四月自河北西路
運判改東路運判元豐元年二月就遷提刑三年六月
除開封府推官此云未幾輔之罷誤也蓋因詔令輔之
還大名府例冊衆人謹挾遂云
輔之坐此得罪其實不然也

癸未詔交趾郡王李乾德歸所掠邕欽廉三州人戶則
如所乞以廣源蘇茂門等州及机榔縣還之仍將造亂

首領就界首斷遣

舊紀詳載答
詔新紀削去

詔新差廣南西路經

畧安撫使兼知桂州曾布至桂州交割州事管勾令趙
高依舊充經畧安撫使以樞密院言安南邊事垂畢須

令趙高首末專一措置故也 入內副都知王中正乞

馬軍選充上軍上軍選充諸班並馬射一石弓從之

甲申中書言應諸縣造鄉村坊郭丁產等第簿並錄副本送州印縫於州院架閣從之

乙酉端明殿學士兼翰林侍讀學士寶文閣學士戶部侍郎呂公著樞密直學士工部侍郎薛向兼同知樞密院事公著既就職與同列奏事畢獨留謝因言臣老於閑外蒙陛下收之桑榆惟知拳拳納忠以報恩遇自熙

寧以來因朝廷論議不同端人良士例為小人排格指
為沮壞法度之人不可復用此非國家之利也願陛下
加意省察上曰然當以次收用之上初即位韓絳即建
議復肉刑至是復詔執政議公著以為後世禮教未備
而刑獄繁肉刑不可復將有踊貴屨賤之譏吳充議復
置園土衆以為難行王珪欲取開封死囚罪試以剗刑
公著曰剗而不死則肉刑遂行矣議竟得寢據時政記
公著以十

七日戊子供職向以
二十二日癸巳供職

詳定禮文所言禮記曰郊特牲

而社稷太牢又曰祭天地之牛角繭栗蓋以覆載之功
無物可稱故用繭栗犢取其誠慤以小為貴也特牲而
已不及羊豕以少為貴也配坐以祖祖遠而尊以天道
事之故亦特牲書曰用牲於郊牛二春秋傳曰養牲養
二牛是也嚴父明堂則有牛羊以其欄近而親故以人
道事之詩曰我將我享惟羊惟牛是也本朝儀注昊天
上帝皇地祇太祖皇帝之坐各設三牲俎不獨配位誤
用羊豕而正位亦不專用特非尚質貴誠之義伏請改

親祠園丘方澤正配位皆用犢不設羊豕俎及鼎匕有

司攝事準此從之

新舊紀並書詔祀天地及配帝用特牲

又言正配位不

當設簋簠尊豆請改用陶器仍以櫛為杓又言取火于

日當以照饌及共神厨之用并請從本所訪求鑒與方

諸試驗以取明水又下江南饒信等州采鬱金香與得

其真以和鬯酒又言景靈宮太廟設洗於皇帝版位之

西非是請設於阼階下當殿之東甬仍罷景靈宮所設

燿火並從之

郊廟禮文自有本文今但舉其要而削其繁辭佗皆倣此

司農寺請

自今以存留一半錢所糴糧斛別為一項更不與常平
舊管同估價從之 三班奉職羅昌皓言昨差齎敕書
禮物往占城國今畫占城至交趾地圖以獻上批昌皓
不憚難危遠使絕域雖不能成元初受命之功然勤勞
海道亦可矜獎宜轉一資又批自安南用兵獻議討賊
者以百數其言水陸進師之道往往不同未知孰得宜
類衆說成書各繪圖附見以備他日之用乃詔檢詳官
王伯虎梁燾編類

丙戌環慶路計議措置邊防徐禧言陝西路至並邊豐稔異常物價至賤乞以百萬緡分借逐路經畧司計置異時復令轉運司償納詔提舉成都府路茶場司撥錢十萬緡賜環慶路四十萬緡分賜秦鳳涇原路並令經畧司市糧封樁仍令三司支解鹽鈔五十萬緡付陝西路轉運司市糧草熙河路走馬承受長孫良臣言朗珪兩族共六百餘人雖從來借地耕種終非已所有乞于河州或南川寨側近根括空閑及弓箭手逃田內標

撥二十頃分給從之

丁亥詔三司應係省及上供年額錢所買銅鉛錫其所
賣本錢令三司移用外餘並依條封樁 中書檢正吏
房公事祠部員外郎王陟臣權發遣兩浙路提點刑獄
檢正禮房公事太子中允集賢校理崔公度同知禮院
管勾國子監檢正刑房公事太子中允館閣校勘范鏗
為利州路轉運判官樞密院檢詳刑房文字太常博士
李深權提點荆湖南路刑獄檢詳吏房文字祕書丞呂

大忠為河北路轉運判官檢詳兵房文字殿中丞薛昌朝知邠州初上以中書檢正樞密院檢詳官皆置貲過多至是裁減陟臣等六人而在職及二年並升一任仍自今檢正官以四員檢詳官以三員為額詔占城與交趾為仇國其起居及內燕聽回避如願赴燕亦聽交人與占城使遇朔日並赴文德殿分東西立望日交州使副入垂拱而占城赴紫宸起居大燕交人坐東棗殿上占城坐西廡時占城使副乞避交人客省以聞故也

詔邕州昨自交賊殘殺人民至今戾氣未息水火疫
癘相繼近又土像動搖尤可駭異宜下轉運司差官同
本州長吏集隣部修潔僧建水陸道場為死者薦福令
曾布陳倩同相度遷城利害以聞先是州寺有塑佛嘗
一動搖而明年交人入寇至是又動而火焚官私廬舍
幾盡其後蠻儂智春叛復動如故於是權知州錢師孟
投之於江中

錢師孟權知邕州未詳儂智
春叛事在二年六月甲辰

戊子詔陝西轉運司求訪西天梵學僧令乘驛給裝錢

赴闕 詳定禮文所言國朝南郊儀注皇帝升自午陞
司徒奉昊天上帝之俎下逮祝史皆升午陞有司攝事
太尉亦由午陞升壇且午陞者人主所升答陽之位也
臣下與至尊同階此程元素所以極論於唐也或曰神
俎當由午階是大不然按少牢饋食禮俎序升自西階
惟所俎以主人親羞故升自阼階則知升階者繫乎人
而不繫乎俎也郊丘之東陞社壇之西陞猶廟西階也
郊丘之午陞社壇之北陞猶廟阼階也禮以定尊卑別

嫺疑為本伏請親祠園丘惟天子升午陛及從升之臣
依舊外其司徒祝史當升東陛若有司攝事則太尉亞
終獻亦由東陛升降庶得禮意從之

禮文元年九月又
十七日依奏

言者詳禮意惟人君得升阼行事阼主人階也雖尊如
尸其入廟也必由門左其升堂也必由西階雖親如子
其冠也必筵于東序少北其適東壁而見母也必降自
西階故曰凡非主人則升降自西階明一尊之義也今
太廟儀注熙寧祀儀開寶通禮開元禮亞獻終獻以下

其升降俱由阼階有司因循不講之失也伏請自今行禮亞獻終獻公卿祝史並由西階以應古義景靈宮亞獻終獻及司徒司空升降東階亦乞改正詔詳定所再參詳又言臣等徧考禮經無臣子升降阼階阼階天子踐而行事非臣子所得升降若謂以賓禮待尸而尸升西階則宰夫祝史之屬亦升西階是豈所謂以賓禮待之者也其贊衛臣僚從君升降者既從于君自當由阼從之

元豐元年七月初奏九月十八日再奏乃從今附十七日

又言郊特牲器用

陶匏象天地之性故開元開寶禮有司攝事亦有匏爵
熙寧祀儀有司攝事惟言洗爵拭爵而不言匏因此不

用匏爵伏乞自今改用從之

元年九月十七日依奏

又言今太廟

尊彝之數溢於古仍不依四時各設朝享或雜以冬烝
及春祠夏禘之禮其蜃尊二乃四方山川所用者並乞
據禮改正春祠夏禘用雞彝一鳥彝一犧尊二象尊二
壺六秋嘗冬烝用罍彝一黃彝一著尊二壺尊二罍六
大祫從鄭衆說用虎彝一雌彝一大尊四山尊六壺六

為十八尊禘享如祫但減山尊二為十六尊以本周禮

從之

元年九月十七日依奏

己丑詔聞熙河州官場糴米斗錢百五十在市百二十
令葉康直根究虛增價因依以聞 詳定禮文所言周

制由命士以上父子異宮祖禰異廟所以致恭而不瀆
也祭法曰適士二廟春秋書桓宮僖宮聘禮有之某君
受幣于某宮魯子問曰主出廟必蹕是人君達于命士
莫不然也惟諸侯之下士則父子同宮而居祖禰共廟

而祭後漢光武儉不中禮合高祖以下至平帝為一廟
異室同堂屈萬乘之尊而俯同周之下士歷代因循不
革臣等以儀禮求其迹以爾雅辯其名以考工記約其
廣深謹圖上八廟異宮以始祖居中昭穆為左右以進
詔送陳襄等詳定本朝可行典禮以聞然卒未果行也
然卒未果行也六字從朱本增入詳定所奏可行典禮
在四年十一月二十一日新本不載朱本并附此當刪
之取又言祀天之有禋柴猶祭地之有瘞血享廟之有裸
鬯皆是歆神之始非謂於祭之末燔燒胙餘也蓋周人

尚臭掃地而祭故先燔柴於丘上所以升煙而降神也
漢魏以後祀於壇上故三獻畢收牲幣祝冊黍稷爵酒
饌物而燔之所以送神也今郊禮祀於壇上蓋循漢魏
以後故事然禮畢升煙非所謂禋祀尚氣也伏請俟降
神樂止先燔以為歆神之始詔詳定所再叅詳又言禮
經燎升煙所以報陽陰祀自血起故熊氏云凡大祭並
有三始祭天以煙為歆神始祭地以埋為歆神始然則
升煙燬血以致神祇不可不在先也雖然致神祇矣方

有事焉至於禮畢則以牲幣之屬而燔瘞之然後為禮之終故儀禮為祭天燔柴祭地瘞血鄭氏以為祭禮終矣備矣周官司巫凡祭祀守瘞而鄭氏亦以為守之者以祭禮未畢若有事然祭禮畢則去之此說為得而先儒有謂於燔瘞之始即用牲幣之屬既不經見而又未及薦神遽已燔瘞之則是備於先而闕於後也至後世知燔瘞牲幣于祭末而不知致神於其始則是備於後而闕於先也欲請祀南北郊先行升煙瘞血之禮至薦

奠禮畢即依舊于壇坎燔瘞牲幣之屬則始終之禮備

矣從之

禮文元年七月五日送詳定所再參詳九月十八日依奏

又言者詳祭禮惟

主人受嘏故特牲饋食禮皆曰嘏于主人雖主婦猶不嘏焉凡非主人俱不當嘏曾子問曰攝主不嘏不綏祭蓋將欲受福先減黍稷牢肉隨祭於豆間今避主人不敢受嘏以其不嘏故不墮祭也梁明山賓議請郊廟受福惟皇帝再拜明上靈降祚臣下不敢同也詔依其議開寶禮及儀注熙寧祀儀天子親祠而亞終獻飲福有

司攝事而太尉飲福受胙則于禮為非伏請自今親祠
惟皇帝飲福受胙以專受祉于神然後賜胙臣下以示
均福之義其賜胙及有司攝行事進胙于天子自如常

儀詔再參詳

元年七月
丁丑事

又言臣等詳亞終獻之官蓋君

命之相成其禮者也攝事之有司亦君命之攝行其事
者祭祀之主既自天子則飲福受胙固非臣下所宜惟
君賜之然後為可是臣下可以受之于君而不可專受
于神也其親祠亞終獻飲福及攝事之臣飲福受胙可

罷祭終賜胙再拜自如常儀從之

按禮文初送詳定所再參詳乃元年七月

五日丁丑得旨依奏則九月十八日己丑也禮文因三年八月二十一日辛亥詳定所請改正皇帝飲福受胙

儀注遂并入三年八月辛亥今仍撮取附本年月日

庚寅內殿承制王餘應乞叙歸明繼襲管勾豐州詔以

為麟州都監候滿二年差知豐州詔三司續支末鹽

錢二十萬緡付河東轉運司市糧草

壬辰安燾陳睦言已離高麗國涉海今月乙亥至明州

定海縣詔燾等速赴闕

二月七日往八月八日即真

癸巳御史何正臣言近減罷樞密院檢詳官李深除荆湖南路提點刑獄案深刻薄陰險今為監司士論尤不協聞深妻黃姦穢事在安州適當境上而付以案刺之任實玷朝命望追罷之詔改深知壽州

丙申以知明州太常丞集賢殿修撰李定為右正言實文閣待制同知諫院兼同判國子監

戊戌三司言請于糴便司權住糴鈔錢內更撥錢十萬緡應副河北路轉運司來時收糴軍糧從之詔諸軍

排連長行充承局押官無弓刀手者用見闕階數以六
分為率先取弩手二分槍手三分次排手一分著為令
已亥詔京朝官選人并使臣換文資所試上等第一宜
賜進士出身中等稍優與堂除差遣下等與不依名次
注官內未出官與出官已出官與免短使無短使者升
半年名次

此段有脫誤朱墨本
同當檢中書時政記

呂嘉問言準詔劾臣

違法事聞出于轉運判官何琬舉奏况琬嘗庇受賊吏
及自有賊緣為先奏本府違法事須辯正畢方敢舉發

而琬乃更以誣臣豈不倒置今琬差官劾臣必選用朋
邪害正之人非獨文致臣罪亦使平民橫被考掠鍛煉
望下別路差官詔應琬所奏嘉問等事令江東轉運提
點刑獄提舉司同鞫仍令嘉問具析何從知琬案發事
實結罪以聞

二年三月六日俞充罰銅

東作坊使張之諫為官苑

使就差權知順州權廣南西路鈐轄兼安撫都監緣邊
溪峒都巡檢先是以趙高嘗言順州陶弼衰疾不可倚
仗已令之諫權發遣代弼故也

庚子同知樞密院事薛向請下提舉糴便所自今糴米粟入官仍依諸軍所請用見錢坐倉收糴從之都進奏院言準傳宣取索自九月以後下江寧府文字令具名件詔應官司不著事因發過文字並下逐處供檢申納中書內曾有挾帶書簡亦盡錄同申其臣僚所發私書委開封府下逐家索副本或無底令追省抄錄申府繳奏如敢隱匿不盡許人告犯人除名告首賞錢千緡內有官人不願給錢者每三百千轉一資時呂嘉問何

琬互奏不法事琬奏才至而嘉問辯論繼上琬以為有
從中報嘉問者故詔索所發私書考實也 詔諸班直
槍弩手關依舊例人數於親從親事官簡填外餘並簡
捧日龍衛弓箭手其廢罷槍弩手依已得指揮

欽定四庫全書

續資治通鑑長編卷二百九十三

宋 李燾 撰

神宗

元豐元年冬十月壬寅朔觀文殿大學士集禧觀使王
安石言江東轉運判官何琬奏江寧府禁勘臣所送本
家使臣俞遜侵盜錢物事已經年呂嘉問到任根治累
月案始具今深恨俞遜翻異故加以論訴不干已罪如

琬所言則是嘉問為臣治遜獄事有姦臣與嘉問親厚
交利而已竊恐陛下哀憐舊臣不忍暴其汙行故不別
推究如此則臣與嘉問常負疑謗不能絕琬等交關誣
罔望特指揮以江寧府奏劾俞遜事下別路差官重鞫

詔送樞密院下兩浙轉運司鞫之

陳瓘尊堯餘言載瓘上封事言熙豐大美

今日之所當迷臣下蒙蔽而不言者有二事焉其一逐
鄧綰其二知江寧府呂嘉問與江東運判何琬互論公
事王安石在閤居中訟琬而黨嘉問神考怒嘉問而沮
安石是非明白天下欣聳威福在上人莫敢干熙豐大
美此其二也及封事別奏云臣聞元豐元年知江寧府
呂嘉問與本路轉運判官何琬互論公事王安石閤居

中入劄子救嘉問神考不以安石為是也批送安石劄子付琬琬因而奏辯不已神考於是直琬所奏而嘉問奪官謫知臨江軍安石餞送嘉問賦詩以贈之琬又盡錄其詩而奏之曰諷刺交作神考不以何琬為過也嘉問乃蹇序辰之妻父此二人者皆蔡下之腹心而鄧洵武之密友也何琬之事孰敢為陛下言之乎臣故曰蒙蔽熙豐之大美者由下等也

提舉成都府等路茶場司乞與轉運

司同狀奏舉朝臣一員充興元府通判如資序未合入者帶權字從之

此據中書時政記

岳州言賊詹遇與其黨入

金場縱火殺人劫掠財物已遣捕盜官募敢勇士同力掩殺詔專委轉運使孫頎督捕所用兵卒令於團結內

選募有不用命聽行軍法品官械繫聽旨仍三日一具
已獲人數以聞 命知定州韓絳提舉營置保甲等處
經制水塘初有旨借定州封樁錢萬緡委同提點制置
屯田閻士良買保州東楊等村淤下地種稻作塘陂扼
西山路令安撫使司通管後士良罷詔知保州張利一
管勾薛向提舉至是向被召故以命絳

癸卯判大名府文彥博言編錄九軍庫經等其在京樁
管應副名件及見造閱數乞下軍器監照會從之 以

神衛刺貲王舉為翰林醫官賜紫及絹三百以治太皇

太后疾有著効也

司馬記聞云太皇太后得水疾御醫不能愈會新知邠州薛昌朝久病水

疾得老兵士王麻胡療之數日而愈上聞之遣中使召麻胡入禁中療太后病亦愈上喜即除麻胡翰林醫官

賜金紫仍賜金帛直數千緡

荆湖南路提點刑獄司言賊詹遇已

轉入洪州詔孫頌速依前降指揮不以本路別路並監

督官兵襲逐仍具立告捕賞格關牒諸處會合捕殺

甲辰詔大理寺丞知綿州彰明縣宋大章差替先是提

舉茶場司行劄子督本縣茶場買茶大章繳奏以為中

書樞密院奉行聖旨乃有此式中書批送茶場司具析而茶場司言本司置局在鳳翔府依本路轉運提舉司於諸軍州行牒諸縣行帖本轄場務行劄子皆用久例兼在外官司若經畧總管安撫司經制司羣牧司皆行劄子非轉運提舉司獨敢僭越今大章賣直鈞竒得本司劄子若得異貨即具聞奏用此排擊官長於理未順況茶場兼監官本非奏事官司其意蓋謂本司茶法恤人不便與敵者衆皆有致螫之意因此指摘必欲中傷

以取媚姦黨望特賜彈壓故有是命 司農寺請自今年八月降朝旨後諸路因行役法實用軍人請受比較所代役人雇食等錢歲終具數申寺撥還從之 命叅知政事元絳參定傳法院新編法寶錄先是譯經僧日成死同譯僧慧詢等皆不能繼乞罷譯場乃詔令在院習學續修寶元以後法寶錄候有通達義理梵僧依舊翻譯而絳因有是命

乙巳詔兵部以貢舉敕式內武舉敕條再於諸處索文

字刪類成武舉敕式以聞 兩浙路轉運副使殿中丞
蘇滌改國子博士以應副奉使高麗行李辦濟故也

以左侍禁賈裕為閣門祗候追毀其已轉官宣命裕達

按原本誤作達
今依宋史改正

次子也先是達以經畫廊延邊事其長

子祐得閣門祗候後達除殿前副指揮使以例乞除裕

閣職而詔止遷一官至是達再乞上批祐向所與閣職

乃以達達經畫廊延邊事特推與之非恩例今達所乞

乃除殿帥恩例可依所奏故有是命

裕除閣職在治
平四年十月

詔江南東路轉運提舉司鞠呂嘉問事其提點刑獄王安上不許迴避令依前降指揮同鞠都提舉市易司言乞以見錢於河北出絲蠶州縣俟三司和豫買綢絹足日如民願請價錢委令佐續支給其收歛並依和買條施行從之

丁未重修都城畢工詔知制誥直學士院孫洙撰記刻石南薰門上城周五十里百六十步高四丈廣五丈九尺外距隍空十五步內空十步自熙寧八年九月癸酉

興工以內侍宋用臣董其事役羨卒萬人辦機輪以發
土財力皆不出于民初度功五百七十九萬有奇至是
所省者十之三後洙卒改命知制誥李清臣撰記

新紀書丁

未畢修都城
凡周五十里

戊申都水監言自來前冬至三十日閉汴口今歲閏月
較之常年已是深冬慮大河凌脾為患乞先期閉口詔
限冬至前半月

已酉詔兗州常以省錢修葺宣聖祠廟 上批瀘州軍

前兵士皆自遠遣委韓永武侯討賊還日賜禁軍等特
支錢

庚戌詔司農寺令諸路提舉司應常平金帛絲綿促令
依條變轉如市價賤即以本州逐色元價以貴賤滾同
組計所虧不及一分并許出賣不得抑配如出賣不售
即具如何經畫申寺相度或允充上供錢數其餘物準
此詔在京校試諸軍武藝馬步軍弓弩以加斗石為
三等步射弓馬射驟馬直射背射步軍弩射以箭中多

少為三等床子弩砲以中多少為三等賞銀碗標有差槍刀標排手以勝人多少為三等賞銀標有差不合格

者降等賞無等可降者不賞累中等者聽累賞

兵志十月詔立

在京校試諸軍校藝格馬步軍弓加本軍上等二斗以及四斗弩加六斗以及一石三斗第為上中下三等馬步軍步射六發而三中為第一等二中為第二等一中為第三等馬射五發驟馬向棚直射三矢背射二矢中數第等如步射法步軍弩射自六中至二中床子弩及砲自三中至一中及等凡及等賜銀有差槍刀并標排手角勝負計所勝第賞其弓弩墜落或縱矢不及棚斗挽弓破體或局而不張或矢不滿或弩蹠不上牙或獲不發或身倒足落並為不合格即射以中者賞餘箭不合合格者降一等無可降者罷之合用本志舊錄太簡朱

本特
繁

詔賜侍禁仵全賻贈如死事例錄其弟宣為三班借職以全無子故也全本隸荆湖南路鈐轄何次公下捕盜為先鋒至袁州萬載縣精進寺前與賊詹遇等鬪死之及是江南西路轉運判官彭汝礪言近緣巡歷至全死所其寺僧及居民稱全勇敢入敵賊初為之退却以無救援遂死臣觀自詹遇作過其奮不顧身為國討賊惟全一人竊謂當蒙褒贈上批全雖失於寡謀敗事然賊勢因全殺傷亦為小沮其忠勇身先深可矜惻

宜比死事使臣優賜錄其家汝礪又言全所部兵退避
不赴援者請正其罪從之 詔孫頤以逐處已獲賊徒

量輕重依今分定三等刑名斷訖奏聞其持仗助賊同
劫略不以有無賊並斬初見逼脅因而與賊為用手傷
事主及捕盜人等或迎接賊勢掠取財物借助兵仗窩
藏之類並決脊杖量情刺配本罪重者自從重或為賊
驅迫齎持人口財物受賊賊不以告官之類並決情重
者送五百里編管

辛亥韓存寶破瀘夷後城等十三囤

新紀于十月辛亥書此舊紀在十月

甲申蓋甲申奏到也今兩存之

壬子御史中丞蔡確言竊聞江東轉

運判官何琬言京師有以琬所列事密報知江寧府呂

嘉問者審如此則不可不痛繩以杜交通漏泄之姦乞

令有司窮治如有實乞重施行詔除王安石書外餘並

送御史臺根究 都提舉市易兵部郎中王居卿言應

賒市易錢貨許以金帛等物為抵當收息毋過一分二

釐其不及年者月計之如願全請錢或欲以物貨兼給

者並聽從之

明年正月八日壬子又此
年十二月二日壬寅當考

詔奉使高麗

回都轄西頭供奉官閤門看班祇候宗球遷一資充閤
門祇候更減磨勘二年書狀官前襄州穀城縣令豐稷
前衢州開化縣令鄭晞韓各循兩資其餘第賞有差

命權同判刑部員外郎呂孝廉司勳員外郎權大理少
卿韓晉卿於同文館置司勳相國寺設粥院僧宗梵等
事令勾當御藥院實仕宣監之以上批宗梵緣其主僧
行親擅用官給常住粥錢推其費錢之狀乃出前知祥

符縣孫純借錢文字案法賁貸之人各合有罪而主司以純聯近臣之親特為停抑其辭仍累使人諭純止令私償所負可送無干礙官司根究先是純罷祥符縣得梓州路提舉常平官而行親者舊為純主治田產純欲之新任從行親督錢行親自借常住錢百千給純而宗梵告行親輒持百千出疑有姦權發遣開封府蘇頌曰宗梵告非干已事不當治錢隸常住非官給無賁貸法然純聞事覺即以錢償行親矣宗梵坐決杖或言純乃

頌女嬀堂妹之子頌故出純罪為皇城卒所告上以為輦轂之下近臣敢以情勢撓法審如此則不可不治故有是命 詔韓村埽巡河左班殿直武繼寧追一官勒停餘官衝替罰銅有差坐大河以風雨溢岨失于備預故也

甲寅叙復勒停人張諤叙為太子中允監江寧府商稅諤尋卒 御史中丞判司農寺蔡確言常平舊敕多已衝改免役等法素未編定今除合刪修為敕外所定約

東小者為令其名數式樣之類為式乞以元豐司農敕
令式為目從之 詔三司司農寺各同罪舉升朝官五
人充諸路提舉官限十日以名聞 詔諸州縣修造係
從來于公人圓融雖無文案照據者自今並保明支係
省及免役頭子錢各一半 詳定禮文所言今定十月

丙辰朝謁天興殿依南郊前景靈宮薦享之禮皇帝禔
位當設于殿東陞上洗當東雷南北以堂深東西直東
雷皇帝立洗南北嚮盥詔禮院且依舊儀

朱本削去今
復存之按郊

廟禮文載景靈宮太廟御壘洗不當東甯乞改正元豐元年九月十七日已得旨依所定又三年八月四日又八月二十一日並稱依奏此當考

乙卯端明殿學士兼翰林侍讀學士提舉崇福宮司馬
光乞子康充編修資治通鑑所檢閱文字從之 司農

寺言進士李復王謏踏視府界官荒地募誘閩蜀民種
稻有勞乞推恩詔李復王謏並與廣南路攝官李復王謏初遣

時當熙寧六年十月丁丑

鄜延路經略使呂惠卿乞以本司回易

庫撫養士卒等本錢別置庫不得雜公使錢從經略司

變易止充撫養士卒及賞覘事人如小事止支省錢諸路並乞依此從之 詔昨岳州平江縣民戶為磨遇等焚廬舍令孫頌牒所屬隨區數等第給錢 大理寺言散員都虞候萬州刺史全信乞取衛旦等錢物當追刺史罰銅六十斤降配詔依斷降充湖南本城都頭先是上批全信乞取本班長行衛旦錢物已奏案可速進呈裁斷庶軍中有以警勵至是樞密院奏斷也

戊午錄左班殿直宋密子為三班借差以使高麗密為

管勾舟船巡檢而死于高麗故也 贈皇城使嘉州防

禦使曹佺為同州觀察使佺駙馬都尉詩之父以上批

特贈

已未以宣徽北院使檢校太傅中太一宮使王拱辰為

檢校太尉宣徽南院使西太一宮使許居京師

舊紀書此

左藏庫使昌州刺史曹誌提點萬壽觀其先差提點萬

壽觀皇城使嘉州團練使劉永壽改醴泉觀以誌太皇

太后之姪故也 權發遣興州羅觀乞頒義倉法於川

峽四路從之

志有

詔潭州瀏陽縣永興場采銀銅礦所

集坑丁皆四方浮浪之民若不聯以什伍重隱姦連坐之科則惡少藏伏其間不易譏察萬一竊發患及數路如近者詹遇是也可立法選官推行尋詔舉京朝官一員監場管勾本場煙火公事許斷杖以下罪又詔坑戶限一月首納所藏兵器限滿不肯依私有法其保內有犯強盜殺人放火居停強盜及逃軍私藏兵器甲弩知而不告各減犯人二等並押出場界情重者隣州編管

不知情又減二等有該說不盡事令提點坑冶鑄錢司立法其本場地分排保慮未如法令朱初平依條編排
癸亥置監官十一月甲戌禁私藏兵器編排保甲今并書

庚申判司農寺蔡確言諸路提舉常平司舊兼領于轉運司極有擅移用司農錢物自分局以來河北東路提舉司申轉運司所移用錢二十餘萬緡江東提舉司申轉運司所移用錢穀十二餘萬貫石蓋轉運司兼領則不能免侵費之弊今川廣等路未有提舉官在假故并

轉運司承例兼權欲乞提舉司闕官處止令提點刑獄
兼權如廨舍稍遠即量留吏人照管官物等委知州或
管勾官就便提轄其提舉官時暫在假亦委知州或管
勾官權本司文字又言自今提舉官稱職者乞令久任
候有成效與遷提點刑獄及以上差遣皆從之 詔廣
南西路轉運司劾邕州不救火官吏其都監寨官並械
送獄以上批邕廉州永平太平寨相繼遭火焚失錢糧
器仗州寨皆邊要水陸巖嶮于運致一旦以吏懈弛

所失動計數十萬其失火之人難繩以常法宜速根究
主名斬訖以聞其當職官不救護亦可枷勘故也

辛酉詔荆湖北路轉運使孫頤候會合諸處兵甲選募
敢死之兵六百人擇材武使臣五六員厚供給犒設令
分兩項賈勇而前餘並遣回元差處如賊黨結集寢多
會合官兵力不能制即相度量可存三二百人或增一
二頭項訖奏其彭孫令部領元帶兵甲除選募合留使
用外餘並令歸荆南本將

士戍詔應造簿路分如秋料災傷稅額放及七分以上處權免造並候次年軍器監言昨贊善大夫呂溫卿言五路州軍近年增置壯城兵雖有教閱指揮而所習武藝全無實用如大名府城圍四十餘里砲手止有四入其他掛搭施放火藥全火等人亦皆闕蓋舊無教閱格又無專點檢之官今欲令諸州壯城兵除修葺城櫓外並輪上下兩番教習守禦以十分為率內留砲手三分餘並習掛搭施用拒守器械仍籍所習匠名每季委

本州比試陞降嘗下五路安撫司而五路相度異同本
監今參酌欲乞五路州軍壯城兵遇無修城池樓櫓功
料即令安撫司以十分為率三分令習砲餘並習掛搭
拒守器械其廣備十一作工匠並均付五路準備差使
及指教施用每三年一替自來所習禁書作藝更不許
傳習熙河路州軍亦依此從之又言溫卿謂朝廷差官
製造澶州淳梁火叉其為防患不為不預然恐萬一寇
至以火筏火船隨流而下風順火熾橋上容人不多難

以守禦不若別置戰艦以攻其後乞造戰船二十艘仍
於澶州置黃河巡檢一員擇河清兵五百以捕黃河賊
盜為名習水戰以備不虞下大名府路安撫司相度本
司言澶州界黃河舊無巡檢當止使路若增募戰船竊
慮張皇欲止選河清兵百人為橋道水軍令習熟船水
可使緩急禦捍上流舟筏及裝駕戰艦本監欲依安撫
司所陳從之

癸亥于闐貢方物

兩紀附
年未

詔遣翰林醫官邢慥邵化

及秦玠醫高麗國王王徽內殿承制王舜封管押以徽
嬰風痺因安燾等使還上表乞醫故也又詔舜封如徽
病不能躬承詔命宜授其世子勲授徽世子勲詔命乃十一月丙戌今并書
丙寅三司請榜在京諸色人納私小錢入官毀棄從之

時以在市交易多以外方盜鑄濫惡小錢而商販頗以

為患故也

本志係此事于熙寧十年誤也當從實錄

詔孝惠皇后從孫賀

安竦與班行先是安竦叙叔祖繼宣嘗以先朝后家恩
與奉職未受而亡乞回授故也 詔開封府界諸縣知

縣自今差合入親民京朝官

丁卯御史中丞蔡確言根究呂嘉問等事依條輪差三
院御史或推直官承勘慮不專一乞專委御史黃廉舒
亶根究詔止差黃廉同根究 提轄修完京城所上修

城部轄部役使臣等三十一人管勾年月詔管勾及四
月而合以年磨勘者與減一年內十年十二年磨勘者
依條比折其提轄官入內東頭供奉官守用臣遷禮賓
使遙郡刺史依舊寄資給寄資請受 詔罷開封府界

提點司勾當公事官二員並專充提舉司管勾官其提
點司管勾文字官遇河防保甲事許差出先是提舉司
言本司專領二十二縣常平等事目至繁今提點司已
罷兼領而管勾官二員尚仍舊兼提點司事恐職事不
專一無由辦集司農寺以聞故有是命 經制瀘州夷

賊韓存寶言梅始吉胡斗但十村首領斗箇撒等降已
打誓詔夷賊逃匿山林委存寶更多設方畧討蕩仍呼
召甫望箇恕晏子等或遣人說諭令分布手下得力人

及罷勇等因生熟夷逼逐討捕夷賊每一名一級支絹二十匹如首級數多當議優轉職名并照會七月甲戌詔除老小婦女外依今此指揮施行

甲戌七月二日

戊辰詔罷左藏庫副使霍舜舉西京左藏庫副使王鑒提舉剝机黃汴等河榆柳止令逐地分使臣兼管及委都大官提舉先是程昉立法差官主剝机自熙寧四年為始及是八年都水監言事已就緒故有是詔

元差二人事在

熙寧六年五月十九日辛酉

經制熙河邊防財用司言四川軍依

朝旨標撥官莊田外乞于近城各更擇沃土上腴地二十頃為營田專差使臣等管勾從之

五月九日六月十四日七月一日

錄遂州青石縣令李進卿子為郊社齋郎進卿部糧草為夷賊所掩投之于江後韓存寶求得其屍以聞故也 詔應詹遇驚劫及經歷地方捕盜官不畫時捕殺令逐路提點刑獄司速劾罪不以赦降去官原免

已巳錄三班差使張簡子院喜為三班差使賜名忠并賜其家錢二萬緡二十匹以河北路轉運司言簡本保

丁呈試授官為回河鎮巡檢下指使因夜巡邏望見劫盜張善等五人即先路馳馬逐賊戰死故有是命荆湖南路轉運司言湖北都監彭孫與詹遇等書意欲招降已招牒何次公等須得剪滅乞更賜指揮詔孫願密切體量如是實即候彭孫到任令具析準何指揮招呼賊黨以聞詔開封府判官徐大方推官許彥先並先衝替大方等坐密諭孫純私以錢償僧宗梵故也復華州渭南鎮為縣

[illegible]